

Li leup èt l'agna.

d'après Jean de la Fontaine.

On p'tit bèdot, blanc come dèl nîve,
Po bin mostrer qu'il a crèchu,
Maugré qu'i n' pèseut qu' saquants lîves,
V'leut riv'nu dîre : « Dj'ènn'a rèchu ! »

I prétind qui, ni pére ni mère
N'aurin.n' pus l' drwèt dè l' rimostrer ;
Gn-a nuk à lî cachî misère,
Po s' disfinde, il èst grand assez !

I va fé one grande pormwinrnâde
Avau lès campagnes èt lès bwès ;
Lès prêchemints èt lès couyonâdes
Di cès vîs là, i 'nn'a d' cure qwè !

Là qu'il a fwim, faut qu'i brostéye :
Lès tinrès yèbes sont là po ça ;
Griper à l' copète di l'uréye
Po s' rafyî do richot, véla.

C'èst qu'il a djiboté, noste ome,
Vola douvint qu'i môrt di swè ;
Si rapaupyî, pèter on some,
Adon, il è rîrè tot drwèt !

Nosse djon.ne dôdé, di doûce crwèyance
N'aveut nin oyu là pus wôt
On laîd vî leup, tot fiant l' blanke panse,
Qui bwêrleut : « Ç' còp-ci, dj'ènn'a m' sô !

Po quî ç' qui ti t' prinds, p'tit minâbe,
Po v'nu troubler avou t' mouson
L'aîwe qui dj' va bwâre ? Sèreut ç' capâbe
Di prétinde qui dj' n'a nin raîson ?

– Vos compurdoz bin qui m'-y-idéye
N'a jamais stî di v's-embêter !
Dji su bin cinquante asdjambeléyes
Pad'zo l' place qui v's-î-v'loz lamper.

À v's-étinde, dji vos freu do twârt ;
Dismétant, dji n' bwè qu'après vos !
– Tè l' man.nis l' boune aîwe qui dj' va bwâre !
Èt d'alieûrs, t'as causé su m' dos,

Nin pus taurd qui l'anéye passéye !
On m' l'a rèpèté dès cints côps !
– Dji n' su qu'one tote pitite bèdéye
Qui n' pout mau d' vos prinde por on fô.

Comint p'loz crwêre qui dès bièstrîyes
Qu'on-z-aureut spaurdu su vosse dos,
Vêrin.n' d'on-agna qui tchafîye
Divant di skèpyî, d'après vos ?

– Si ç' n'est nin twè, c'est sûr ti frère !
– Bin dj'ènn'a pont ! Dji su tot seû !
– Onk di t' pèkéye ! Ti pére ou t' mère !
Èt leûs tchins, po m' fé awè peû.

Tot l' monde mi dit qu' ' faut qu' dji m' rivindje. »
Èt sins tchiketer, o fond do bwès,
Nosse leup l' citron.ne, adon i l' mindje :
Il èst l' pus fwârt, il î a drwèt !

Ravauder dès vîyès matènes,
Mi dîroz, èt po-z-è qwè fé ?
Dji v' rèspondrè qu'i-gn-a dès spènes
Qu'on-z-a dès rûjes di fé crèver.

Pinsez qu' vos satchîz al minme cwade
Qui tos lès cis qui nos mwin.nenut ?
I n' sondjenut co todi qu'à stwade
Li p'tit j'qu'à tant qu'il a ponu.

Albert Delvaux.